

重修青城縣志序

蓋自結繩之後有書契記事之文曰志在天文則分經緯於地理則辨山川禹貢一書經兩條於四隕職方所紀恢五服而九畿元和詳郡國之書太平著寰宇之紀廣輿別爲考略通志代有增修數者垂編具有深義一爲萬祀定經久之界謂名山大川無改移一爲王者明無外之規任寸地尺天皆入貢若乃溯人文於下邑必須考志乘於彼都括蒼補遺成於樓公瓌之手吳興掌故見於徐獻忠之編高陵賴涇野而傳武功藉對山而著凡皆同條而共貫允爲體大以思精夷考青城原有舊志始則蕩於回祿再則迄於神宗人往風微浸歸磨滅魯魚亥豕莫

訂譌訛軼事既患其無徵古本並虞其脫略自非續加纂輯何以昭示來茲於是邑侯方公以報最之餘閒矢討論之微志蒐彼記載屬予編摩爰乃慎校稽勩披閱聚公私之簡帙核新舊之見聞或博訪縉紳或旁諮父老或取證於正史或兼採夫家傳或遠索之殘碣斷碑或近得之遺文傳稿裒爲叙次彙成全編惟徵信而闕疑亦釐舛而正誤發凡起例標舉指歸挈領提綱總期畫一倣列史之載循吏增入名宦諸人表彤管之有禮宗重訂烈女一志首尾略具凜信今傳後之心事實頗詳參略迹原心之論百五十年之事敢云掇拾無遺一十二卷之書業已次第告竣風土景物之名勝覽者昭然忠孝節烈之流傳吁

可鑒矣於戲鄉國數典足徵一統之車書都邑考文永奠萬年
之疆理幸生聖代共際休明部次州居屬詞比事例衷諸史詎
等瑣言外紀之誣義附於經非同叢說筆談之謬學慚淹貫承
緒論於先民才謝宏通庸希風於作者計此日校紬旣畢留備
徵文考獻之資俟他年著述有人大啓石室金匱之秘爰弁數
語冠於篇端

告

乾隆二十四年歲次己卯小春朔日萊陽丙子舉人周璫謹

重修青城縣志序

志何昉乎昉乎史也而辭婉於史史尙褒貶志無譏刺似同而異者也古者海內計書先上太史副上丞相太史公因一國之事裁而爲史有紀有傳以至天官河渠禮樂律歷封禪平準無不詳書志則包舉郡邑巨細必錄如山川宮室溝洫風俗田賦學校禮制兵防秩官人物至於災異郵政亦必備載是則同其文而異其權史則惡惡嚴志則彰美而示勸爲多按周禮小史掌郡國之志志蓋又昉此歟然其源自九邱出爾昔陳壽作三國志常璩作華陽國志然皆史也而冒志名志者大要以正疆域辨土貢考俗昭文鑑往而垂來不可廢也而郡邑志之詳略

青坊縣志
三
異焉邑志宜詳郡志宜略而等之故凡邑乘前編綱舉目張文
簡事實者宜復隨時逐一釐正稍有未妥者務義例歸一刪其
不經彙其方策徵其逸事補其藝文咨采從前未編之遺訂正
羣書失收之典如是得觀厥成焉夫志也者所以紀事實也事
無關於政體無益於民生者概不可濫書紀星野則謹四時占
驗所以重農事也紀地理則謹川澤陂池所以備旱澇也紀武
備則詳阨塞所以嚴防守也紀學校則詳條教所以端士習也
紀名宦則重政績所以勸循良也紀選舉則先經濟所以抑浮
華也紀人物則重實行所以敦節概也凡此皆實政無非所以
爲民也古人以土地人民政事分紀誠卓有所見非苟而已也

時

光緒十九年歲次癸巳仲夏貢生李允升譔

重修青城縣志序

夫邑有志乘國有史書用著先進懿行以昭後世使人民知所勸懲得有觀感而興起也然史書所載善惡並存邑志則專註善行不善者缺焉亦寓善善從長惡惡從短之微意也青邑自明萬曆三十年楊司空夢宸先生重修因曾遭回祿重修亦無異創修崇論宏議焜耀一時續志稱爲良史才非虛譽也至清乾隆二十四年越一百五十餘載經孝廉張倬先生續修凡邑中故家遺俗名公碩德博採其前言往行集爲撰述以示來茲惟科第恩榮功業卓著方得列於選舉忠孝節義宿儒名流始能加入人物道有可傳文足勵世乃可書於藝文是志書所序

不但紀德位錄勳名已也亦欲使後起者仰聞望之隆動百世儀型之慕耳煌煌鉅策不可爲邑中名教大法哉計自張公而後迄今逾一百七十餘年其中徽猷偉績忠孝賢良湮沒失考者更僕難數何文獻之無徵闕焉無聞若斯之久也茲因縣長王公樹森留心世道倡修縣志而舊志年遠失修魯魚亥豕莫可辨認幸有李公允升續稿藏留持此以作粉本校對無訛若管中窺豹全豹瞭然在目矣豈意採訪初興王公交卸新任葛公家俊握篆青邑奉內政部暨省政府頒修志之令徵求各縣舊志程式以不背黨義務合時宜爲宗旨值此國體更變世勢遷移之際上憲明令未宣體式如此難定也嗣經民政廳奉省

政府令徵取六朝秦漢以上碑碣圖書青邑無考又徵取明朝
以上者有焦文炳董積躬楊夢袞諸名公碑碣存焉遂印刷若
千份以呈上聞旋即民國新組織條例隨各局所陳明宗旨利
益以昭建國大綱令羣黎遵守奉行又除十柜採訪員報告事
蹟外遂彙集百餘年見聞所及各杼管見以備展覽採擇庶於
沿革建設之新法盛衰興廢祥異災變之故迹有所稽考續述
不致泯滅無徵也尙望後起之君子繼此而詳加參訂得以留
傳不休不惟東鄒有慶國家亦與有光焉故歷叙原委略作承
先啟後之小補云

時

中華民國十八年歲次己巳邑貢生韓履吉謹識

續修青城縣志序

民國癸酉年冬余奉命握篆青城夙夜靖共求可以興利除弊嘉惠於民者切實推行勤政之餘索觀縣志以徵文獻於先哲乃棗殘梨缺字跡模糊魯魚亥豕之處亦多青邑縣志修自乾隆二十四年迄今百七十餘年未嘗續修所有歷代文獻湮沒而不可考者不知凡幾後之人欲有所因革損益而無所適從余甚憂之尤幸近奉省令飭各縣一律續修志書余首倡之邑紳和之刻期設立志局延聘通儒主任編輯並分遣多士廣爲採訪期限三月從事續修現經脫稿首卷起星野迄古蹟志之本意也中卷錄典章文物事實變更志之通例也末卷紀文詞

補遺缺附雜志乃推廣緒餘而羽翼乎斯志也衍其目六十有九約其類一十有八若土宇離合之蹟戶口登耗之由風俗人才美惡盛衰之實與夫征役之所以昔寡而今多莊田之所以昔無而今有建置之所以昔廢而今興者必皆循例以定其名立論以通其義詳不繁而欲明簡不遺而欲覈未敢自信也質諸名流復行校正事竣當序以識其歲月嗚呼志豈易言哉俛惟茲土在元前爲東鄒在明初立爲縣列入國圖因之賢人君子宦蹟亦多矣皆缺而不爲或爲而不傳余何人斯敢妄議耶雖然志卽史也志以紀郡縣之事史以志天下之事定是非別善惡以公勸懲者史也考俗尙驗政治以備採撫者志也史以

嚴萬世之大閑志以表一時之公論大閑立僭竊不敢踰公論明而邪議不能惑志有資於史也大矣欲爲維持世道計者可無慮哉此孔子不足徵之歎所以發也是郡縣之志似緩而實急也余不敏曷足以與此夫惟食其食而不忘其事民之休戚實切於身政之利弊親擊於目旣不忍以不言又不能以無言故不自知其言之戇且激也取譏獲戾烏可追乎昔李吉甫作元和郡國志謂爲政者執此可以治天下噫是編也後之君子恕其妄而察其愚則於斯邑臨政之始或未必無小補云

峕

中華民國二十四年歲次乙亥孟春之吉洵陽楊啟東震聲氏

撰

續修青城縣志序

志一統者博而宜精志一邑者約而宜備雖大小不同而傳信則一夫貴乎傳信者豈徒矜雅贍廣見聞供文人學士誦習已哉將使山川城郭廬舍井田先哲之典型民生之休戚披圖展卷燦若列眉而蒞斯土者興利除弊易俗移風胥視乎此青城縣志自乾隆中葉以後失修迄今一百七十餘年無起而繼之者吾鄉震聲楊君適權斯邑奉省令重修縣志蓋與邑紳王君兩村董君貢如諸君子議定續修諄諄囑余總其事自慚謏陋數充濫竽夫一邑土地人民典章文物凡足以驗興廢考得失備爲掌故可資考鏡者惟志書是賴惟去古愈遠變遷愈雜續